

晚晴簃詩匯

第十五册

晚晴移詩匯卷三十七目錄

顧貞觀

八首

曹鑑平

六首

李先復

一首

方峨

二首

姚昇

一首

張鴻佑

四首

范璐

一首

越珥

一首

余學益

一首

郭宏岐

一首

柯崇樸

六首

程尹起

二首

安致遠

三首

劉鼎

一首

徐元夢

六首

韓莢

八首

王鴻緒

九首

徐秉義

一首

徐倬

六首

李基和

三首

宮夢仁

二首

周士皇

一首

顏光猷

三首

汪鶴孫

六首

謝簡捷

一首

黃伸

二首

柯維楨

四首

李來章

一首

邵瓚

一首

王作肅

一首

彭定求

三首

胡會恩

四首

張榕端

三首

李應鴈

一首

高層雲

二首

馮雲驊

二首

王奐曾

二首

談九乾

四首

葉舒崇

三首

納蘭性德

二十三首

李瑞徵

三首

季騏光

三首

李聘

四首

馬子驤

二首

黃之裳

二首

申頌

十四首

晚晴簃詩匯卷三十七

徐世昌

顧貞觀字華峯一字梁汾無錫人康熙壬子舉人官內

閣中書有鱸塘集積書巖集

詩話梁汾少有異才尤工樂府年二十餘游京師題詩寺壁云落葉滿天聲似雨鄉關何事不成眠魏柏鄉見之即日過訪名遂大起早與吳漢槎齊名及漢槎久戍塞外說成容若營救未得寄懷金縷曲二首容若見之感動曰山陽思舊都尉河梁並此而三矣漢槎竟因此獲還時稱嘉話梁汾晚自選詩不滿四十篇旨在古澹其登滄浪亭詩云由來澹蕩人別作流傳計翕翹賤原嘗虛徐狎莊惠蓋自道也

專諸塔

倚胸交戟事誰憐埋骨猶臨大道邊結束新春兒女隊蒼涼古巷姓名傳浮圖舊俗還仍漢匕首遺謀竟誤燕細飽炙魚三月味只應身寄太湖船

許溪行

溪口白雲晴不歸溪邊紅雨沾人衣老漁收罾坐釣磯人
家賣酒開雙扉槎頭編老鰕魚肥短蓑藉草相因依欲醉
不醉煙霏微去與亂鴉投落暉

雨止纈塘書舍抵暮無一人過橋上者

山淺雨亦深煙光暮如積杳然清池上薺與塵土隔倚杖
玩浮漚憑闌數歸翼無生復奚滅有動隨所息磬響時一
來懷哉巖岫客願言依此境共對香鐙夕

春夜大雪念儲汜雲宿舟中詩成黯然兼寄應雲皆

人兄弟

百里非遠涉忽嗟行路難蓬窗半夜凍積雪摧檣竿念子
擁衾坐知余撫枕歎吳中文翰侶公讌方極歡暝響迷玉

漏晶輝瑩珠盤誰持一尊酒慰此孤舟寒前路逢二謝客
愁應少寬平生倦水宿歷歷驚風湍

開先漱玉亭

壁立雙芙蓉正臨無底谷誰揮修月斧盡削銀河曲倒灑
萬斛珠翻飛千尋玉有龍蟠其下喧極眠更熟縱橫題石
字但見莓苔綠洗鉢注軍持餘生此焉足

灌園

不自量筋力求爲人灌園意惟營一食迹若避羣喧誰遺
五色芝服之詫騰鸞奈非塵埃種移時安得蕃還將理菜
畦膏澤資泉源黽勉試操作編籬復插援早韭和露茁晚
菘凌霜翻但從采掇便未覺烹飪煩心形誠苦疲旣飽亦
軒軒向讀神農書近聞老圃言

夜聞梵音

一鐙山牖出隔竹露光泣坐聽香臺人法華中夜轉清泉
漱寒玉細入吳音輒嚼蠟況橫陳凡襟何時遣

秋曉登滄浪亭呈宋中丞

初日上東南林亭空宿翳草香珠露重的皪侵衣袂唱杳
曲池菱吟餘小山桂猶聞遺翰墨但惜沈碑碣望古情已
深懷賢感亦係由來滄蕩人別作流傳計翕翹賤原嘗虛
徐狎莊惠誰陪飛蓋游屬和高文麗

曹鑑平字掌公號桐陽嘉善人康熙壬子舉人官內閣
中書

長干行

妾家舊住古長干蕩子風濤十八灘一逐江潮去不返年

年江上孤帆遠正是離人腸斷時
湓城月出潯陽晚

長安上巳篇

二月驅車到燕市又見春光逢上巳
氤氲細雨度輕風吹徧郊原桃與李
桃李芳菲三月時千門煙鎖綠楊枝
夾道朱樓回繡轂良辰祓禊泛金卮
金卮繡轂青油幕層城日出歌鐘作
象管銀箏不暫停駝峯翠釜紛相錯
多少游人策紫騮芳郊十里暎煙浮
蹀躞錦韉垂匝匝葳蕤步障擘笙篴
蘭皋池遶花如霰乳燕呢喃散青甸
遲遲晴日麗西山翦翦春風臨上苑
西山上苑盛繁華碧草芊緜罽落霞
衛霍爭持百寶扇金張競擁六萌車
人生富貴何能測及時行樂誰人識
當歌對酒不盡歡屈首蓬蒿亦何益
此日風光政豔陽此時游冶政徜徉
釵拖赤鳳盤烏髻幫染鵝

黃墮馬妝只恐韶華不久待如雲車騎一朝改日斜難返
魯陽戈萬古惟留明月在明月依然照綺筵酣歌誰似永
和年欲採芳蘭隔江水越樹燕雲各一天竭來潦倒長安
陌矯首君門迷咫尺平津閣上每辭賓樓船帳中無揖客
匹馬行將去帝京漫天飛絮送歸程計到江南春色盡滿
庭新綠亂嘯鶯

吳江晚泊

繫艇松陵道天空候雁過晚山雲影薄秋水月明多客路
憑舟楫人煙近薜蘿蒼茫蘆荻外鷗鷺滿晴莎

舟次天津

春月辭家出津門入夏過從知燕市近還見海雲多萬堞
臨高阜千帆蕩濁河幾同哀雁度鄉思更如何

稗賓客江陰詩以懷之

楊柳臨風兩岸斜
思君春暮尙天涯
幾人江上同爲客
何處樽前不憶家
季札殘碑淪蔓草
春申濁浪走平沙
旗亭早貰蘭陵酒
莫使歸程滯落花

送季冲之任鬱林

檐帷百粵擁鳴騶
四十專城是壯游
驛路梅花初破臘
炎方木葉少逢秋
山縈峻嶺千盤出
水落滄江萬里流
此去日南天欲盡
春風先到鬱林州

李先復字曲江南部人康熙壬子舉人官至工部尙書

斷臂烈婦行

烈婦鄭氏長溝民何獻圖妻少事孀姑至孝會吳逆作叛夫負鉤隨征姑亦出

婦獨居突有武弁張某騰入挑之則詈誘以金愈

詈再脅以刃乃大罵張連砍其頭顱遂斷左臂中

夜死鄰人鳴官跡其狀見滿室血斷臂在戶右刀

插戶側婦偏體傷下衣碎裂露尸四月顏如生噫

威武不屈此謂大丈夫女子云
乎哉爰紀其烈以俟采風者

長溝之山山矗矗長溝之水水曲曲蒼崖松老風謾謾村
婦衣單形影獨織無機絲春無粟荆釵蓬鬢顏如玉良人
長征翳可憐從軍輪輓秦師前阿婆牧犢柴桑外日斜長
望望不還紅輪未暝青山紫馬蹏蹏黃塵起輕裝寶劍
羽林郎下馬斜窺顏色喜入門偎倚餌甘言正氣剛腸森
髮指孤身匿跡恨無門事到艱難惟一死兇徒怒起刃交
加血花淚花落紅雨中庭電掣雷霆吼神龍只抱驪珠走
烈婦守身誓拌身身甘百碎何惜手手既斷心如鐵血干
行腸百結君不見漢代明妃馬上嬌銅雀空勞鎖二喬紅
顏白骨埋荒草姓氏誰將烈女標吁嗟乎別夫不於室拜
姑不於堂慷慨赴義何忙忙千載而下仰清風於高山之

崔巍兮與流水之汪洋

方峨字媚雪一字玉巖大興人康熙壬子舉人官新建知縣有媚雪集

贈倪永清

九峯山色高嵯峨川原平遠堆青螺劉夏村南泗水鎮片帆我亦曾經過此時我年方二十乍見老成尙差澀客邸惟拈詩與書日鍵芸窗足不出少年情性好交游一時懷刺干名流盧文子張洮侯朝朝約放龍潭舟松江有白龍潭鱸膾蓴羹羅滿座玉簫金管吹清秋此中有人數詩伯開言便及蚪髯客清譽真應千古傳彩筆爭誇萬人敵近來作吏來西昌寥寥風雅推平章卽或有人弄筆墨譬如無腔牧笛橫山莊永清倪子來日昨頓使洪都風雅作絳帳旋開

徐穉亭赤幢久樹滕王閣興酣搦管發大呼十三大郡都
驚愕門外頻停問字車雲中又見銜書鶴驟然相見卽相
憐須識神交已有年把臂發狂話宿昔恍若置身黃浦青
溪邊過我訟堂一交接便覺胸中有冰雪太白劉伶共醉
醒許由巢父同高潔卽席還當贈片言文中雄長詩中傑
猗嗟乎君才磊落非等倫得君如得金千鈞他時歸遇雲
間客道我爲官鬢似銀

雪過漁亭

村市溪頭雪裏經人煙寒處認郵亭沿流竹艇排銀漢劈
面雲峯插玉屏秀絕山川渾一色空憐魚留見三星尋梅
放鶴饒幽賞爭似兵廚醉不醒

姚昇字扶東永年人康熙壬子舉人官開化知縣有東

巖草

詩話扶東從中冕盟兄弟以詩相切劘嘗游京師名動公卿初宰德清值歲大祲未報方徵賦扶東至力請賑多所全活目睹民艱凡有所作皆哀苦語德清士夫比之元道州春陵行罷官歸貧甚怡然自得集已佚僅見之畿輔詩傳非其至者也

西山晚眺

不識桃源路依稀訪舊林
攬衣穿仄徑躡屐上高岑
樹影歸雲暗泉聲落澗深
山川老我輩愧此一登臨

張鴻佑字右君號念麓元城人康熙壬子舉人

雨中登北固

北固臨江峙層巒接碧霄
樓吞京口月鐘落海門潮
帶雨拾山果披雲採藥苗
石磬逢老衲指點說金焦

雨後過海潮庵

泊舟來野寺香閣晝氤氲雨過千林溼門開一磬聞登樓
瞻海氣掃石卧江雲不識支公社容隨野鹿羣

黃美中歸自西湖

半年離思隔江天河朔初歸訪戴船孤杖曾探天柱月輕
裝應帶海門煙隄邊楊柳懷坡老井底丹砂憶稚川聞道
客途詩興好高吟莫惜向人傳

西園雅集喜秋水自廣陵至

西園樽酒罄交歡雨過高城竹氣寒六月故人江上至十
年白髮客中看池邊漲水通花徑樹杪歸雲度石欄倚杖
深松懸暮色蒼蒼落日下煙巒

范璐富順人康熙壬子舉人

詩話康熙壬子漁洋典試蜀中璐與弟琚
同舉平西亂作徵之不起漁洋賦詩美之

巴江柳

之子莫相送依依人可憐多年芳草路幾日豔陽天隄上風吹笛江邊月繫船馬蹏隨記取踏破少城煙

越珌字山公貴陽人康熙壬子舉人有澹峙軒集

秋日游憑虛洞

一龕藏古洞陟磴爲尋幽雲氣忽然合天風吹不休水爭三峽險山使五丁愁覽勝真清絕新涼況入秋

余學益字勝友黃梅人康熙壬子武舉有半山藏橐

游多雲山

雲中樵斧聲偶雜樵夫語撥雲尋徑曲邈焉少伴侶登高一俯視離離蕩禾黍白雲無定時青山自千古

郭宏岐字文克益陽人康熙壬子武舉

見嶽樓

峻嶒高閣倚天邊授簡閭公愧少年一片江聲流檻外萬
峯雲影到窗前消除白晝還憑酒檢點青山不用錢北望
長安思舊侶月明回雁數行連

柯崇樸字敬一號寓匏嘉善人康熙壬子副貢官中書
己未舉博學鴻詞有振雅堂集

自雲門步至平陽作

昨夜宿雲門晨興事清盥縈紆出松徑猶見明星爛頃時
嵐霧收旭日乃始旦巖巒迫迴合蒼翠正淩亂前瞻化鹿
峯隱約釣臺畔溪明魚自躍篠密猴相喚谷口聞鳴鐘林
端辨煙爨今爲祇樹林舊是平陽觀盛衰固有由興廢何
足歎